

08 AUG 1998

MIC TUBUH JENTERA KHAS KUMPUL BARANG KEMAS

KUALA LUMPUR, 8 Ogos (Bernama) -- MIC akan menubuhkan jentera khas untuk mengumpul barang-barang kemas yang dimiliki anggota parti itu dan mencagarkannya di luar negara untuk mendapatkan wang.

Presidennya Datuk Seri S. Samy Vellu berkata langkah itu diambil bagi membantu meningkatkan tabungan negara seperti yang disarankan oleh Perdana Menteri Dr Mahathir Mohamad.

"Saya akan membincangkan penubuhan mekanisme ini dengan ketua-ketua bahagian dan Wanita MIC dan mencari jalan bagaimana masyarakat India dapat membantu dalam pemulihan ekonomi negara," katanya.

Dr Mahathir dalam ucapan merasmikan perhimpunan agung ke-52 parti itu pagi ini menyarankan rakyat negara ini supaya memajukan barang kemas seperti permata dan emas di luar negara dan wangnya dibawa balik untuk meningkatkan tabungan modal negara.

Beliau berkata barang-barang kemas itu boleh ditebus apabila keadaan ekonomi negara pulih dan ini merupakan satu cara rakyat yang patriotik membantu memulihkan ekonomi negara tanpa mengalami kerugian.

--BERNAMA

MT WAT